



Universitätsbibliothek Paderborn

Domus Æternitatis

Reserata, Et Ad Ingrediendum Quotidie Memorïæ cogitationibus,
Intellectûs considerationibus, ac voluntatis affectibus Aperta ; Serviet
quoque pro Concionibus; uti & pro Exhortationibus, in Agoniae Domini
Sodalitatibus

Dirckinck, Johann

Coloniae Agrippinae, 1713

23. Immutabilitas divinæ æternitatis.

[urn:nbn:de:hbz:466:1-50597](https://nbn-resolving.org/urn:nbn:de:hbz:466:1-50597)

Suspiria.

O Quis tenebit cor meum, & figet illud, ut paululum stet, & paululum capiat splendorem semper stantis, & comparet cum temporibus nunquam stantibus, & videat esse incomparabilem? O sempiternus Deus! Æterna memoria tua de me benignè cogitet; intellectus tuus me respiciat; voluntas tua me diligat; immensitas protegat, natura conservet, virtus roboret; lex dirigat, vita animet; ætas ætatem meam labantem ac paulatim fatiscentem, ita perficiat in tempore, ut tecum perennet in beata æternitate.

CONSIDERATIO XXIII.

Immutabilitas divinæ æternitatis.

Apud quem non est transmutatio, nec vicissitudinis obumbratio. Jacobi ep. c. 1.

7. Martii.

I. **Æ**ternitas Dei est prorsus immutabilis. *Ego Dominus & non mutor. Malach. c. 3. 6.* Id est, sum immutabilis
in

in omnibus. Nam æterna Dei natura ac substantia est immutabilis, quia est & manet semper eadem, nunquam alia; semper sibi similis, nunquam varia; semper stabilis & perfecta, nunquam vel in minimo mutationi subjecta. *Apud quem non est transmutatio. l. c.*

II. Æternitas divina est immutabilis, quia nulla in ea est generatio, nulla corruptio; nulla auctio, nulla imminutio; nulla compositio, nulla divisio, nulla accretio, nulla decretio; *nec vicissitudinis obumbratio. l. c.* Qualis in æternitate sua erat, ante mundum conditum, talis est modò, eritque post tot annorum miliones, quot sunt in æthere stellæ radiantæ.

III. Æternitas divina est immutabilis, in actionibus. Omnis enim cogitatio, omne consilium, omnis voluntas, amor, odium, complacentia, displicentia, gaudium, felicitas, quæ modo in Deo est; ab æterno in eo fuit, & in omnem æternitatem erit; absque ulla variatione, accessione, aut imminutione, & manebit semper idem ipse, sempiternus, immortalis atque incom-

186 *Domus aeternitatis. Consideratio*
incommutabilis: *Quem nec spatia dila-*
tant, nec brevitās locorum angustat, nec
receptacula ulla coarctant: nec voluntas
variat, nec necessitudo corrumpit, nec mœ-
sta perturbant, nec leta demulcent: cui nec
oblivio quidquam tollit, nec memoria red-
dit. S. Aug. Med. c. 12.

Suspiria.

O *Æterna immutabilitas & immuta-*
bilis æternitas! Tange apicem ani-
mæ nostræ, radio lucis tuæ, & mentem
nostram trahe sursum ad te, supra omni-
um mutabilium sphaeras, supra solis an-
nique vias, super omnia bona creata: &
redde eam quodammodo immutabilem
& imperturbabilem. Itaque eam tibi in-
dissolubili charitatis vinculo astringe, ut
neque mors neque vita; neque ubertas,
neque paupertas; neque gloria, neque
ignominia, neque voluptas, neque ad-
versitas; neque sublimitas neque pro-
fundum, neque ipsæ inferorum portæ,
& universa diaboli tormenta valeant
eam, perturbare, convellere, aut à te se-
parare in æternum.

8. Martii.

8. Martii.

I. **Æ**ternitas divina, ulteriùs, est immutabilis, ita ut ab omnibus Angelis, hominibus, cæterisque creatis, nihil illi intrinsecus accedat; omnibus pereuntibus, nihil pereat. In æternitate sua, ante mundum conditum, tam erat felix ac dives, atque est nunc, post mundum conditum. Unde ex mundi creatione, ex Angelorum, hominùmque obsequiis, cultu, honore, laudibus, nihil illi accedit felicitatis aut gaudii intrinsecus. Non enim cuncta creavit, commodi & solatii sui causâ, verùm ut bonorum suorum affluentiam communicaret, & creaturas divitiarum suarum participes redderet: quemadmodum sol aërem illuminat, non ut sibi proffit; sed ut rebus inferioribus bene sit. Lessius de perfect. div. L. 3. c. 1.

II. Manet itaque æternitas divina, omnibus creatis, demptis, invariata: nihil enim illis, vel positis, vel demptis, illi accedit, vel decedit: non aliquid substantiæ, non aliquid potentiæ, non magnitu-

188 *Domus aternitatis. Consideratio*
gnitudinis, non intellectio-
nionis, non damni, non lucri, non loci,
non temporis, non sitûs, non modi, non
rei ipsi intrinsecæ cujuscunque. Quia,
quidquid ab æterno in illo fuit, id in æ-
ternum perseverat.

III. Pereat igitur cœlum, pereat terra;
pereant Angeli, pereant homines, in ni-
hilum redeant res creatæ omnes: Deus
tamen nihil perdit, nihil de substantia &
æternitate sua beata amittit: sed æquè
plenus gaudio, plenus beatudine, atque
omni bonorum genere permanet. *Opera*
manuum tuarum sunt cœli, ipsi peribunt;
tu autem permanes. Hebr. c. i. ii. Ex qui-
bus patet, quamvis Deus opera nostra
bona amet, æstimet ac præmiis æternis
remuneret; ob promissionem suam &
merita Filii sui; quæ sunt infiniti valoris.
Scelera quoque nostra justè pœnis æter-
nis plectat, nec opera tamen bona, nec
mala, quidquam felicitati ejus æter-
næ, intrinsecus, aut addere,
aut demere.

Affectus

Affectus humilitatis.

O Deus æterne, immutabilis, tibi que sufficientissime! Quis nisi insipiens, sibi blandiatur, quod multum pro te fecerit; aut laboribus suis, aliquod tibi beneficium præstiterit? nam præterquam, quod hæc infinita alia, tibi ex gratitudine debeamus; tūque ea optimo jure, à nobis possis exigere; omnia ista non tibi, sed potius nobis & proximis nostris prosunt. *Si peccaveris, quid ei nocebis? Et si multiplicata fuerint iniquitates tue, quid facies contra eum? Porro si justè egeris, quid donabis ei, aut quid de manu tua accipiet?* Job. c. 35. 6. Absit ergo omnis complacentia, absit inanis gloria. *Dixi Domino; Deus meus es tu; quoniam bonorum meorum non eges.* Psal. 15. 2.

9. Martii.

L. Æterna Dei immutabilitas, & æterna sapientia ac potentia, semper immobilis, & quod admirandum est, semper in motu est, semper movet: semper quieta, & in omnibus laborat; semper

190 *Domus eternitatis. Consideratio*
per antiqua, & omnia invocat. Deus
enim est *immutabilis mutans omnia, nun-*
quam novus, nunquam vetus, innovans
omnia; semper agens, semper quietus: col-
ligens non egens, portans non implens, pro-
regens, creans, & nutriens & perficiens.
S. Aug. L. I. Confess. c. 4.

II. *Æterna Dei immutabilitas, quid-*
quid agit, semper invariata persistit: cum
mundum creat, regit, mutat, punit, na-
turam humanam assumit, mira opera-
tur, patitur, crucifigitur, moritur, re-
surgit, ascendit, Spiritum sanctum mit-
tit, ignominiã afficitur, vel honoratur,
laudatur vel contemnitur, non tamen
ideo mutatur; non vicissitudinem ullam
cogitationum, consiliorum, aut volunta-
tum subit; non affectu ullo novo tangi-
tur; sed in sua simplicissima identitate
immobilis & in primævo statu suo fixa
super omnia perseverat.

III. *Æternitas illa immutabilis stat*
semper immota, semper inconcussa, ve-
lut rupes in immenso, æternitatis & infi-
nitatis suæ oceano, dum reliqua omnia,
quæ sub sole sunt, accrescunt & de-
crescunt,

crescunt, proficiunt & deficiunt, juvenescunt & senescunt, florent & deflorescunt, virent & exarescunt, veniunt & abeunt, pereunt & in nihilum suum relabuntur. *Omnes ut vestimentum veterascent; Tu autem idem ipse es, & anni tui non deficient.* Hebr. c. 1. 11. & Pl. 101. 27.

Petitio.

QUare, ô æterna immutabilitas Deus meus! Ego instabilis & variabilis homo, omni vento, aurâque inconstantior, pro firmitate ac stabilitate, ad te supplex confugio, atque obsecro, ut instabilitatem meam stabilias, & mutabilitatem meam, quodammodo immutabilem reddas; ne velut stultus identidem varier, aut velut luna mutet; sed sicut sol in conspectu tuo, absque eclipsi, omnium virtutum splendore refulgeam. Oro te, firma me in te, stabili me in te, rege me per te, ut in omni bono, immutabilis perseverem, omnibus diebus vitæ meæ, donec tibi jungar in immutabili æternitate.